

B1

Ut ludos saeculares celebraret ad Horatium animum convertit Augustus, ad vatem qui primis libri tertii carminibus ostenderat non modo se virginum proelia iucundique munera Bacchi iocosis canere lyra posse sed etiam graviore cantu egregia Romulae gentis facinora virtutesque maiorum egregias. Principi igitur roganti recusare Horatius non est ausus, etsi dubitavit utpote plane intellegens arduum magnique esse ponderis quod sibi sumebat officium. Cum carmen autem scriberet, more suo, lente elaboravit Horatius, acerrime omnia cogitans neque ullum praetermittens versum quin antea illum apte atque numerose currere et adaequate exprimere quae mens fingeret excitata sensisset. Cum vero, diutino limae labore omnibus effectis, carmen perfectum absolutumque Horatius se expedivisse intellexit, acri tacitoque gaudio est vates arreptus, intenteque legens delibansque versus, dilucide sensit se expromere valuisse sensus affectusque qui, sacris illis sollemnibus diebus, inconditi atque confusi in Romanorum civium agitarentur animis. Ecce autem coram oculis Horatii carmen strophis suis distributum, concinne fluens atque modulate. Oportebat vero ut apte sociaretur rhytmo qui vim et versuum leporem augeret, quos numeros vati assidue citharam police iicienti, descendens coelo ipsa susurravit graves atque canoros Calliope. Cum porro magni propinquarent dies, opus fuit festinanter puerorum puellarumque eligi chorum et ad exercitationes vocari. Quis autem laetitiam poetae depingat dum domi sua, flore Romanae cinctus adulescentiae, enixe contendit ut hymnum suum iuvenalem alacremque doceat turbam, illamque audit liquida ac magis magisque secura voce strophas concinentem? Post multa nocturna sacrificia, sacra sollemnia diurna magnificentiore et splendidiore apparatu optavit ut fierent Augustus, utpote quae ad Romanorum vindices fautoresque deos laudibus extollendos pertinerent; primoque die in Capitolino colle bovem marem Iovi Optimo Maximo Augustus eique sociatus Agrippa immolavere, bovemque feminam die sequenti mactavere in Reginae Iunonis honorem.